

四庫全書

集部

欽定四庫全書

集部

洹詞卷一

欽定四庫全書

集部

洹詞卷一

詳校官中書臣孫 洪

中書臣劉源溥覆勘

總校官庶吉士臣朱 鈴

校對官中書臣葉 炎

謄錄監生臣馬紹基

欽定四庫全書

集部六

明

洹詞

別集類五

明

提要

臣等謹案洹詞十二卷明崔鈍撰鈍有讀易

餘言已著錄是集題曰洹詞以鈍家安陽境  
有洹水故也一卷二卷曰館集三卷曰退集  
四卷曰雍集五卷至十卷曰休集十一卷十  
二卷曰三仕集皆編年排次不分體裁襍著

筆記亦參錯于其間銑力排王守仁之學謂  
其不當舍良能而談良知故持論行已一歸  
篤實其爭大禮劾張璁桂萼風節表表亦不  
愧其言所作政議十篇準今酌古無儒生迂  
濶之習他若漫祀十條可以補宋史之未備  
謫傳兩則可以靖明代之浮言而岳飛論一  
篇稱飛之急宜奉詔班師尤識大體益不特  
文章自可傳也第十一卷中有嚴嵩鈴山堂

集序似涉南園作記之疑然嵩集載此序題  
嘉靖己亥據明史嵩傳是時方為禮部尚書  
未操國柄尚無由預識其姦是猶司馬光之  
于王安石非陸游之于韓侂胄矣乾隆四十  
四年六月恭校上

總纂官臣紀昀臣陸錫熊臣孫士毅

總校官臣陸 費 墉



欽定四庫全書

洹詞卷一 館集

明 崔銑 撰

乙丑同年便覽錄序

黃御史希武編次乙丑同年錄屬馮無錫景祥刻之而以序屬銑吾三人者皆見於錄中故也凡舉進士必有登科錄姓名郡邑之類皆在焉復編此者以省叙也以省叙者便覽也其便覽者為有事於四方者也同年有

世講之義自吾之身而即忽且忘焉至薄也過其里廬而若固知塗之人也以同年流而為塗人其可悲也已是故開卷之際存者沒者升與沉者感其所遇之異而吾則無異視也率吾黨而毅友道者必是錄矣夫友道有二焉禮也義也其情篤者其禮完其分深者其義重禮不完則隙之所由生也義不重則市道之為也是故生相問也慶相賀也沒相弔也是之謂禮進必相引以賢母或妒也退必相要以正母或係也患難必相扶持以

全母或陷且棄也是之謂義皆將於是錄考焉於戲率吾黨而寂友道者必是錄矣夫

別石樓李老先生序

自銑事先生十又三年入則聆教誨出則仰聲光顥望偉度銑弗逮矣先生方引翼之銑升沉數易先生直以大者期之此皆視為偶然之逢弗齒也夫古人師友誼篤酬知感遇孳孳然惟不朽是圖私德不與焉未嘗不感激慨歎思友其人於千載之上顧歲改事移志荒而

卑行懦而却文支蔓而弗成章誠恐一旦滅沒無所藉以見古人非先生孰成之先生又還朝矣躡蹠且不暇何能進也然先生教誨度望銑得識而修之否雖日侍先生無益也今天子朝夕想像賢臣之風采喜先生於既見矣少宰之職統百官掌邦治夫統百官巨衡也掌邦治總責也非剛明平直如先生弗勝古賢臣之業要其極如天地然舉天下物物在其中非徒翬翔一世之上激清名於一朝發義氣於一二事以為得也誠者立

本也謀者定事也樂者祛難也拗之者至殆也隨之者至蠹也非老成邃密如先生將無儻事矣乎於乎此先生當往也銑欲私留者鄙矣

翰林庶吉士題名記

擬作

士而仕于朝自一命以上皆有所職少怠則黜罰加焉惟翰林庶吉士仕矣而以讀書為職則猶夫士也是故處之禁署以專其志給之既稟以裕其家閱之載籍以博其見督之文臣以稽其業自永樂甲申至弘治乙丑

若干科若干人矣於戲士不逢時猶且學聖人之學以植已而濟民况待於上之人乎哉夫三年養之數十年用之薄養而厚用寡蓄而大發而欲盡獲其效不亦難乎予聞處事變者存乎才燭顯微者存乎識妙感應者存乎德成是三者成乎學則夫後世之學代更世易各出其見而欲得其真固難矣即有之而咻羣和寡能堅而不變則又難矣學果非真則才失之邪識失之陋德失之頗而諉曰用之勿求備非予所知也院舊未有題

名學士某創為之錄其名考實也勒諸石垂久也虛其左  
俟續也紀以文厲同志且著鑒戒也

送馬僉事序

南京御史大夫晨入府中盡啓故牘程其屬功能之高  
下將薦之備陟焉迺閱案問曰往巡江上剔偷妥旅使  
行如歸何烈也遣馬御史乎從史跪檢已仰對曰是也  
往理戎畝賦足而下不驚何惠也遣馬御史乎從史又  
跪檢已仰對曰是也邇昱盜匿獲降光蔽愆卒置於理

聞者愉愉何明以執也遣馬御史乎從史如前對大夫  
曰於良御史與若速具疏吾上之未上馬君已拜江西  
僉事人莫不以為當也君方警畏日求未備諸御史具  
其事授銑曰先生故職文字其將有益於馬君也銑曰  
唯唯君子於天下談不如見億不如歷不見而談者冥  
也不歷而億者紲也夫去蠹莫過乎烈字下莫過乎惠  
燭幽莫過乎明終事莫過乎執四者人之美行也君既  
舉之君吳人也江西楚也吳楚之民其習好同御史僉

事外內對置其職業同以四美而行乎二同之間君何患乎無政也君字善徵癸丑進士

對江話別詩序

對江話別贈顧開封也開封為郎厥有盛名迺聞於上陟守大郡夫名著則思實任重則思才實不修則名墮才不稱則任儻是故惟君子能憂之亦惟君子能告之告之故永言之示不忘焉於乎吾觀是詩而知友道之益也僚友之詩其辭明其旨切文游之詩其辭婉其旨

遠執友之詩其辭揚其旨深明以切者警之也易事者  
跼難事者立是忠言也婉以遠者風之也讀之使人油  
然動心不駭情不嵬視是微言也揚以深者美之也知  
有美則愛之愛之必永終之矣是危言也三者因其分  
之異也望以不朽其意不異也吾故曰觀是詩而知友  
道之益也

贈劉宣城詩序

成都劉觀陽在南京考功七年初為主事泉山林公為

太宰敦綽雍容密隙覆汙止責大指有長者風覲陽承之無咈人曰君行何類宰也曷易覲陽曰唯唯覘其行事無易後拜郎中野亭劉公為太宰剛峭嚴冷程功剔蠹細小不忽有大臣節覲陽持故守人曰君何咈宰作也曷附覲陽曰唯唯覘其行事無附夫世故曷已惟理則定吾持其樞以御其變高極乎層玄深入乎重泉巨并乎無外細破乎秋毫吾未嘗往彼不能離何有舍已以逐人哉橘踰淮而為枳貉越汶而斃無恒性也竊脂

不穀松柏雪而不萎劫火不燼玉定分故也是故亡而徒拗者賊更以求容者瘞飾者奸昧者張皆可悲也已覲陽遷寧國太守過予室別求贈言予謝曰君故履已固且諸君詩在卷矣

贈陳子序

陳子文相居諫垣奏事忤旨繫獄兩月除名其母氏訃又至陳子罪躬省咎其友崔仲子銑歎曰偉乎陳子之為丈夫也雖然天豈重困善人乎哉士惟末之養已往

利而舉易際亨而志輕舉易多舛志輕多喪故却而後能進降而後能伸紓而後能達天之大孚人也松柏在山歷霜雪風日之摧折數百年而材棟梁任之而況於人乎天豈重困善人乎哉世之成務者曰明曰直迷幾失會罔正惑徑其名為盲枉我逆人屈志附咻其名為俛盲不能行俛不能伸予於封事見陳子之明曰練而中予於抗論見陳子之直曰罔畏威而回口然明生於思塞於億直出於理敗於氣思通微者也理幹事者也

恃億必疑疑則狹任氣必侈侈則凌疑人者人將疑之  
凌人者人將凌之當事而使人疑且凌於是乎怨起而  
謗騰下譙而上眩矣夫思不精則明不遠理不充則直  
不大欲精以充學哉學哉

說文贈馬敬臣

夫羣遊尊合者市人之行陽訛陰詆者險夫之心故孚  
以義則越域弗能間也期以大則隔世弗能感也昔者  
銑與馬子及二三子之友也見異必求言易必規行奧

必正容慢必風一日之中有新知焉一會之中有默變焉自銑及馬子之仕也言不盡規行不皆正容不復風見不暇求一日之中有弗知焉一會之中有漸背焉夫交不形親惟心是堅道不迹觀惟當是符自今而視銑欲通故而失之渙寡與而失之傲容衆而失之隨感時而失之放論事而失之激因俗而失之染是古之宕人也馬子見事明而不發慮事深而不泄處世安而不遷是古之篤人也馬子過銑百矣馬子猶璞玉然銑雖有

他山之石無所用之大學之教長者服之少者則焉齒長而無敵為銑之罪也馬子何與與然無取於行為恥并廢於言為薄請終銑之言而毋棄可乎夫見善欲為勇之大也聞義即悟智之先也為病於待待者沮於私於是乎懦心生焉悟病於襲襲者格於近於是乎輕心生焉懦而猶以為強輕而猶以為周是故語大而發小見漫而中疎心勞而力却志廣而才滯要其中者欺也傳有曰母自欺詩曰如切如磋如琢如磨此之謂自慊於乎馬

子母棄予言

石淙對

客問曰地以域分域以名定太宰楊公取滇之石淙以名江南之居古與豫生曰有之昔周扁濂溪著其鄉也呂書東萊追其先也夫著其鄉則思為之重是故有弗辱也追其先則思為之紹是故有弗弗肖也弗辱曰仁肖曰孝仁且孝其惟君子乎客曰賢不遺位而成名智不遐行而滅德翁方居巖廊之上乃耽山水之僻襲居

士之迹殆不可與生曰奚為而不可也夫無累者弛張易省緣者去就決甘淡泊者紛華不移守退讓者勢利不亂故鵬之搏者適而已龍可豢而食之者欲而已昔伊尹成功而罔居周公攝政而思明農懼盈之災也唯君子不有成不枯位於是乎業著而道尊奚為而不可也客曰然則翁將隱與生曰未可也君子之於世無去無就惟道之從介士甘遜迹以遂高退士務匿名以辟咎志士求危身以著節義士樂奮勇以垂聲曰行不同

失中一也臣之事君交有淺深任有輕重恩有厚薄夫  
違則去之穀則恥之初仕者處常之法也大臣則異故  
交深則必懋其德任重則必安其業恩厚則必永其祚  
知消息盈虛之幾貴豫處治忽安危之繫貴節是故汲  
黯寢淮南之謀直也韓琦平內間度也司馬光改法實  
也夫大臣者國之寄未可遽言隱也客曰元結寄義於  
七泉張詠表德以乘崖石淙之義將是類與生曰然吾  
聞陰陽之氣凝者為石流者為水凝者無變信也流者

無滯智也石體順故可器水止於內故不可禦孔惡其  
硜孟非其激在人也亦然惟信能立以通行則不窒惟  
智能運以正出則不流是故有惻怛之情曰仁存而不  
妄曰誠行而不踰曰才因勢曲成唯中是經曰權發於  
仁體於誠斯盡信矣周於才達於權斯盡智矣此之謂  
備是故可以立已可以事君可以權出處可以正天下  
備之至也

南京工部虞衡清吏司題名記

虞衡郎中一人員外郎一人秩皆下大夫主事一人秩  
上士掌山川林澤之貢凡貢鳥以羽獸以革材以陰陽  
具內于王府四方季上工稽其遲速為之等已使執藝  
及期則遣還凡治戎器皆掌之夫富邦國以貢飭邦國  
以工平邦國以戎入貢貴儉布工貴均治器貴精侈用  
極好窮搜數索曰奢空藝徒名私夥公歛曰傾數備實  
亡形完用折曰敝奢而後民匱傾而後事廢敝而後究  
作三者國之大疚司虞衡者有罪焉今天下事歸北京

遺南京者什一二然其責均虞衡無題名碑歲久者無  
聞郎中唐君榮惜之乃創為止列近歲若干人他無徵  
故然亦可以考實後宦者將有警與唐君字仁夫廣西  
人

問政篇贈方鎧

方子為尹問政於崔子以王子為介崔子曰夫為政擬  
乎古者多泥泥斯滯矣因乎俗者多隨隨斯蠹矣故不  
外取而足者身之謂也予昔與子升於汴闡業於國庠

既潛于豫郊知子舊矣子之為人也信中而直行遇事  
以果舉斯以往是為政也夫積愛蓄惠使民弗疑莫大  
於信布公正僻使民弗咈莫大於直定法一聽使民弗  
易莫大於果信以主之直以斷之果以成之三者既備  
政無不美者矣信貴能明執偏廢全其失也塞直貴能  
容任情馭物其失也絞果貴能詳疾行寡顧其失也率  
塞則民惑絞則民踐率則民譙三者不去政無不疚者  
矣是故明以立信誠之通也容以翼直誼之大也詳以

出果知之周也夫然後居則中正動則準方子謝曰子之言大矣美矣鏗敢不敬崔子賀曰子言及此是吳橋之福也

跋豪傑錄

夫古以準今哲以表學故考古者將以蓄德匪曰廣聞企賢者將以正行匪曰備故不然雖高文大冊猶倉箱之菽穀我何與焉

五吏篇

深文鍊法此苛吏也而世尚之曰法理之吏飭外修譽  
此偽吏也而世尚之曰嚴明之吏逢顏逆向此佞吏也  
而世尚之曰恭謙之吏暴斂厚征此賊吏也而世尚之  
曰功能之吏巧徵審取此貪吏也而世尚之曰材幹之  
吏近臣徇私愛而稱之世主采浮稱而禮之禮之則加  
賞焉反是雖張季之平卓茂之真延壽之正陽城之寬  
張堪之清近臣徇私惡而毀之世主惑羣議而棄之棄  
之則罰加焉非介士必因賞而改心因罰而渝節五吏

者治之蠹而貪為之源也夫貪匪以自養已也必遺近臣以求譽於是取之豪右豪右復取之細民取之豪右什去其五矣取之細民什去其七矣久則罄夫徒貪民不憚而獲微也必制以苛苛必能而後行必覆以偽偽則譙民而恐上聞必悅以佞佞非征斂無以自見也必肆以賊如是然後可以遂貪是故五尚行而吏不良五吏興而民不安求國長治弗可得矣

上西涯相國書

竊聞忠君者遠不間其情厚師者微不格其敬君師大  
倫也顛而能扶為忠愛而能諫為敬銑趙之賤士也待  
罪侍從坐視時變上未能訟言於君次未能私告於師  
是天下之大罪顧思不敏中實空然知罔行殆何堪聽  
聞銑是以憂深而醉思劇而顛徘徊門牆進而屢却也  
伏惟執事好士容汚若將弗及寸材尺美未嘗遺之豈  
獨銑之棄乎用是敢布腹心焉今有人病羸者精竭而  
神憊獨面人耳然嗜飲好內未已或告之曰子之病也

危久將不起必斥而弗信使其父兄弟弟垂泣而告之必懼使國醫告之必悅然而淚下矣何則父兄弟至戚也其言必不罔國醫識精也其言必可徵今天之病深矣財殫而用加侈民疲而勞未已賞數而功不勸罰輕而罪不威令下而不循惠施而不霑官肆貪而法廢事取具而實亡天下十有三省耳用兵者八朔方兵敝玩而不力公私以供匱人材以利偷若再有嘯聚何兵以討邊或寇入兵馬之在內者留之恐邊輕遣之恐

盜張廟堂之經營始大也雖然此見事銑耳不得聞口  
不敢言者又百此乎今九重及帷幄臣偶未之思耳然  
惟執事能告之執事自輔先皇澤流而望尊先皇大漸  
執手流涕付以愛子權重而人服一也執事少秉清節  
逮貴愈堅相樂酌會為國著蔡行高而人信二也是故  
以戚則予以識則國醫故曰惟執事能告之也執事弼  
亮初政調和瑾虐釐獎庚午入告累矣似猶未厭天下  
之望也頃聞執事上疏忠懇而中繼聞請明農子不云

乎大臣以道事君不可則止執事去之是也然亦有否夫事幼主與成主者不同度而建功處平世與紛世者不合迹而致績善始而不完其終猶無始也竊窺執事者蓋欲以身示儆云耳夫告人之道三積以誠者要其信也動以容者要其感也示以利害者要其懼且聽也文字章奏言者意弗盡而聽者情不達效固難獲矣竊願執事時請面對創難而覆易善存而惡敗帝王之軌祖宗之典誠于中而徵于容因其明而通其曲上英武

冠世深信而改度然後天下可徐理也若一二帷幄臣執事與共政矣昔有二客登舟入艙熟視之世讎也見必以刃接舟及中流風二客駭而共圖之卒濟非前相怨之深而後相克之力也志誠在於生故彼臣者亦願執事之善告之也彼誠我聽故亦可以有助矣又聞古之君子之事君也智不售則曲勢以求成力不施則廣謀而獲遂夫君以為社稷也吾為固之如磐石然以待君悟舉完器而付之而後臣之道不缺不然使至如所

謂無如之何者君幸悟奚濟也竊意執事之計之不可緩也夫舉政以才行介而內信學深而知政藝精而適用才之全也偏得者酌用之毋以科目拘其進毋以浮僞溷其真毋以麤率逞其直毋以小瑕遺其長毋以資格緩其為使部薦其監監薦其守守令各薦其屬抑倖治貪厲心表節嚴其進覈其僞不惟得真才亦可以正士習矣自天子以至於士未有不須諍士者忠直謀略者執事宜引以自輔使之慤懃盡其諮詢不無裨也周

上需繫民心財也蓄久者積為力者充食冗者耗費奢  
者窮賈誼曰一人作之十人食之必饑十人作之不能  
衣一人必寒今內廷之奉軍旅之供者可計乎南以水  
荒北以盜蕪其歲入幾何也財不足則民貧民貧則苦  
生苦生則心離心離則凡可以救死者何不為夫盜者  
擾始也擾之靡靡英雄因之而起是故亂自財始子曰  
節用而愛人周禮歲終計入以會王用官以工皆稽業  
而定既唐併庶官今皆可行也夫本強者能制弱枝備

豫者能當卒變禁兵本也重鎮備也兩京禁兵伍以內  
賂而缺操應故事而舉治戎者循例猶以紈綺子將之  
一旦緩急此屬可仗乎當燎眉濡髮之時尚修拱手徐  
行之度非計之得也秦晉兩鎮地險人勇于今尚安及  
後可恃選將以練禁卒擇人以守秦晉厚結民心精治  
士馬守險廣儲俾可憑藉今議者曰土兵劣於邊兵未  
知計者勇不自奮作之斯興技非自長習之斯熟太祖  
定中原江上卒耳太宗北伐中土兵耳是故安危在所

任倡者利鈍之係也夫政貴因時法先救獎出塞者必  
求助非深服其心能制其命者否也昔董闕子為趙守  
過深澗壁峭若墻下瞰百仞問曰嬰癡狂悖之人牛馬  
犬豕有誤入此者乎鄉人對曰無有闕子曰使吾法猶  
澗也則人莫之敢犯胡不治故不可以弘治之政施之  
今也是故烹一阿大夫則諛者遠而罰懲封一即墨大  
夫則讒者遠而功勸無別而緩非所以為政也愚生何  
足以知國事竊窺天下之勢不急救將不可為伏惟執

事當國安危攸繫故敢俯伏門下稽首上書干冒台嚴  
不勝隕越之至謹伏斧待罪

贈高生序

始張西渠病予與王淇東候之予曰天疫曷慎諸西渠  
曰偶不佳耳予即延醫醫曰傷寒少陽症也下藥而西  
渠病大作頭岑岑如戴石氣着人如炙孟無涯何大復  
曰予舊識高生者善醫數有功也已而高生至切西渠  
脉曰果寒疾也出活人書示諸君曰是是症是方宜也

大復明脉田水南習醫家言諸君善談理者參榷之予  
視生色柔而應緩竊疑其弗勝也秦西澗曰子以辯言  
飾容者為能乎夫足內者不炫裕行者寡辭辯言飾容  
而用折者子以為能乎越二日西渠病憤瘍面而中泄  
予懼謂生及諸君曰弗可坐待也已生瞿然曰張公近  
臣也傷寒颺症也吾甚敬近臣而重颺症吾所以來為  
張公也苟有愈張公者毋有避也蔡石岡舉醫一人朱  
給事一人予舉二人次又舉一人然諸醫言各殊予私

諗生生曰夫傷寒者遲則注急則敗是故治之有會焉  
僕之術蓋弗謬也最後張復泉舉一人予候其至視之  
盱瞻而揚貌切脉已悉非前諸醫論曰濕症也其言支  
蔓不會理視生甚倨生色和孜孜酬應不倦予罷其人  
不用或惑之予歎曰周制冢宰統醫師使治其屬正術  
而稽事夫正術則下寡歧業稽事則虧無溷心禮失而  
真昧真昧而業紛業紛而虧作然後民謹而咎彼藝固  
毋深究也於是咸尊用生使盡其術越二日而西渠汗

矣又三日面不瘍矣中堅矣西渠甚德高生問謂予曰  
子異生之術乎曰然夫好大言者宕醫也易惑而移者  
懦醫也據方而不權者庸醫也好自用而債者虐醫也  
擠衆論以售術而不恤人之死亡者賊醫也均之能殺  
人也賊莫甚焉西渠曰然又曰始子疑生何也曰慎之  
以審其才也子求醫何多也曰公聽以求全也何卒從  
高生曰諸君子之明也

張舍人墓誌銘

張舍人名倫字天叙千戶張能適子也其先滄州人祖某從太祖伐元後發藍黨逆謀授府軍左衛千戶後從太宗靖內難改北京府軍衛其子孫因家焉舍人早卒無子舍人止一弟傑襲千戶傑一子瓊無他張也舍人老實無嗜好北京四方之人在焉其風錯故其習殊貴勢之習侈俠少之習儇商賈之習便寒約之習俛儒學之習貴獨舍人斤斤然木訥人也然其事父處弟如禮要其中亦有負乎而弗獲長年使人無述焉故諺曰棟

材弗成朝花則榮巧藝不比拙就得利悲哉王媼王千  
戶愷女也年二十五嫁舍人舍人死時媼年三十二為  
孀婦四十七年始瓊生數歲其父母以寡子故甚愛之  
媼瓊諸母也獨奇之曰振張氏者此兒也吾夫死竊憂  
門戶衰今幸天不絕張氏矣瓊失母媼撫訓之瓊果積  
官列九卿舍人宣德丙午九月三日生天順五年六月  
三日卒媼宣德甲寅十二月二十三日生正德七年七  
月十六日卒舍人享年僅四十媼乃七十九然媼劬劬

婦節期不食矢言則勞瘁過舍人百矣舍人信有婦哉  
媼卒之次月一日殯啓舍人穴合葬銘曰已乎已靡嗣  
只難乎難勸妃只章女行曰太史祔女襍女從子

別友

詩曰他山之石可以攻玉銑仕得二友蔡子成之穆子  
伯潛蔡子布衣予與接曰仕者著文也蔡子內朗外潤  
遇事隱重不泄穆子靖專而凝發篤向文史獨銑佚蕩  
二子不棄之其有見乎哉古之交也會文而翼善居觀

而弼違而猶重贈別蓋感於情則聽必重期於久則思  
必恒定於要則行不渝茲二子將銑別矣銑不可二子  
未嘗默然意沈而詞婉銑淺中叢論非二子將斥辟之  
而況聽思且行乎而况重且恒而不渝乎蔡子長於智  
智者事之君也疑者智之絳也怯者疑之滋也吝者怯  
之役也夫成敗靡形判之於幾吉咎曷因帖之於理理  
順而吉咎不乖於趨幾明而成敗不撓其向是故與其  
周百慮而失為孰若就一得而著節不吝無怯不怯無

疑而智矣穆子能守然君子之心深含六虛洞觀萬變  
往以序而非拘會於一而非遺是故理昧多窒事因多  
憂養淺多露學孤多惑見泥多陋著意雖善而非普物  
雖外而內孟子曰所惡於執一者舉一而廢百此之謂  
也

張先生墓表

睢陽蔡公守濟南卒子天祐財成童張雲鵬先生以易  
教授見天祐器之先生居睢陽東陵里中天祐往從之

游既天祐入太學先生作知縣矣天祐家素寢先生數周之乃得飫朝夕先生治經不臆入不竒探曰先儒有訓其索蹟而辯辭矣心麤氣逸胡為背乎其教曰寡欲以養身守身以能官者操領也夫塵則颺而水則濁繩則直而木則度故欲熾者心亡已枉者如乖先生真知學哉先生不得進士知三縣又不偶而退老于東陵先生孝貴悅心不憚曲遇政貴定民不徼赫號仕貴獲已不嗜厚成詩曰豈弟君子於先生見之矣天祐善銑濟

南公銑大人之友也天祐思先生教日欲礪行以酬知  
立石以章幽銑聞而歎曰濟南公膏秩而家約嗇榮而  
節信先生用未昌而行孚天祐承家而不倍師是故濟  
南達其忠先生宏其化天祐永其譽

送左毅夫還常州序

予外舅鶴翁使俾以左君桓來曰若宜有贈予問左君  
欲奚聞左君還辟再拜曰始桓以郡檄起戶部書筭九  
年給冠帶將授八品秩顧多病不願即仕也暫請歸郡

予曰子以布衣入京今歸則榮矣常爾父母邦詩曰維桑與梓必恭敬止而况兄弟兄弟之行乎而况王父父之行乎惟謙不府惡惟約不叢尤勿怠辱勿怙貴勢其庶哉左君曰吾宗自徵君來遂大叔祖名御史也吾父義士也藐焉孤桓未有紹前人者予曰宗之大者難守先之賢者難繼顧大則無俟於亢賢則無患於無因子誠不忘則思修修則繼繼則能守矣左君曰桓少也業文而通筭學無成獨以筭名吾恥之無能大其先也

予曰子恥子之未學固也而卑筭於後世所謂文者不亦惑乎古之君子之學學道也而曰游於藝藝者以廣道也夫數大極乎億兆細入乎絲忽天地莫外其圍鬼神莫測其變使人思精而約理達而該故君子貴焉後之君子之學言經通故而已矣言文摛辭而已矣弊神至死而不知道者何物也是故憤愚惑庸飾譽長偽子何慕焉左君謝曰桓未之聞也體於道驗於器終身不敢薄吾藝

悔齋銘

乘氣則矜逐物則移女行方迷謂女自知惟誠女藥惟  
聖女師女不進德不死胡為

右銘

女有百非惡人女揚女有寸是怨人女藏於乎豈有女  
獨是而人皆非於乎豈有女既為而人弗知嗟女亦奚  
如斯

左銘

序樂趣卷

夫樂由順作憂以逆來事寡順而多逆情向樂而背憂故樂者鮮矣莊周古之名善言樂者也其言曰鵬風而搏其翼樗棄而樹于野迂大不實吾無取焉鵬因于氣樗激於無用因者寄也激者忌也無所寄則漠有所忌則撓夫性以約情則衷順以應事則化是故遺榮則不求忘則不爭無擇則不忮去飾則不蕙靜則安動則達所如則自得夫何寄夫何忌易曰由豫大有得其是之

謂乎紫巖劉先生有從兄鳳居京師鳳有園園有軒王虎谷題軒曰樂趣紫巖及晉諸大夫遊而適焉於是說闡其旨記載其業賦敷其事詩揄其興颯颯乎和平之音洹野子紫巖諸大夫之友也紫巖曰惟卷有序所以紀始永終暢厥大義也敢託吾子洹野子曰諾

贈秦子

孟子曰凡有四端於我者苟能充之足以保四海秦子之交諸子也過規而善勉難恤而禮恭可謂得友道矣

秦子之理儲也稽實杜請伸善懲猾庾豐而芻粟美可謂得剛道矣秦子治利而不染其在草場也不舉權觴而甘菲食可謂得廉道矣秦子清薊地也畝明於官租寬於民弱免豪茹後無害貽可謂得惠道矣夫不知者寘則亡適則不行不者枯而寡味則不充秦子知矣行矣其弗充乎哉秦子拜郎中督儲于宣府當路器而拔之也邊者衛夏之垣食者守邊之本才者足食之方道者御才之轡是故充友道以待僚則衷充剛道以理

食則足充廉道以止辟則畏充患道以臨民則安夫鑑  
別形而醜忘怒公也水溺物而舟常浮虛也輪運重而  
輻不折衆也木脆質而根穿石積也故曰日新之謂盛  
德是故德盛則業大矣

趙節婦壽詩序

予觀趙節婦壽詩歎曰厚哉鄭子之為道也詩曰我送  
舅氏悠悠我思夫遠則恩易殺疏則情不聯世固厚父  
族能厚其母家則寡矣而厚其祖母家則又寡矣節婦

為鄭子祖姨母嫁莊氏節婦有三善焉少失夫而貞曰  
節教養四子曰慈存夫之弱弟曰義雖男子或愧焉當  
時節婦叢苦而嘗瘁人疑不壽乃今八十健矣謂天無  
意於善誣哉節婦念其姊字鄭子鄭子思其祖母及節  
婦於是節婦之行野倡而朝和幽而章久而著可以示  
鄉婦然為之者鄭子也於乎厚哉鄭子之為道也

送何仲子知巢縣序

昔梅溪君汝之聞人也潛不隳行卑不降志節矣伯子

景韶學潤於鄉治立於民才矣季子景明行靖而執辭  
美而典名稱奕如也文矣景賜者梅溪君之仲子也兄  
韶而弟明敦貌而質行夫世貴之子人寵之已則易之  
世賢之子人重之已則難之內外有則出入有畏德成  
而易焉曰重才非拔則不能亢宗行非卓則不能騁軌  
人重之必望之望之必思罪之矣曰難故紀慚太丘或  
劣仲豫不可不慎也仲子初仕得巢令夫巢畿邑也令  
牧官也收良則畿民能畿能則遠人柔是故不雜好者

業專不求名者功真援貴者佞生遺患者斂急嗇費則財用足敦禮則教化行刑當而威令簡而舉是故可以為子可以為弟可以為兄孝立者忠遂弟立者牧良

長汀縣主墓誌銘

長汀縣主者趙府湯陰莊僖王第四女也母武氏年十五湯陰鄭璣尚焉授宗人府儀賓初莊僖王賢自貴女擇對鄭氏居小元村七世不析爨其人皆敦樸尚義不失口於人世之機詐不知也璣父諱祥邑稱鄭五老鄭

氏多田故饒於財男力農間出治賈女習蠶織閩外事  
不聞農賈所入皆困之有婚嫁者族長給費寸布合粟  
母或私者成化間歲凶出粟千斛助賑濟雖未遑文字  
其行與古篤行者埒五老少賈於臨清每歸倒橐錢帛  
委地其妻子亦不視長女歸今少傅李公封夫人少傅  
初仕為主事管臨清閘五老不復賈少傅貴鄭氏漸微  
於少傅無干請璣尚主莊僖重其世也縣主聰慧婉順  
凡主適夫家處尊幼悉以亢近年稍抑則乘驢車造人

家飲或出郭竟日嬉揆帝家禮不宜縣主每翁姑入府治具上食唯謹待姻戚如外家婦未嘗輒造人家儀賓或病視湯藥自扶持之數有子女不育存者曰暘娶矣曰暉四歲女一適李繼文卒孫一曰牛住子正德五年十一月二十八日病孕不起生於成化七年九月二十八日享年四十葬於正德八年正月十三日銘曰奕奕篤鄭肇自山西自西徂河于蕩斯棲族大而昌其德孔齊人亦有言俗薄不醫維鄭作砭維俗已而彼飾而偽

樹闕表閭顧茲篤行潛遂可滅我銘主室寔章世德世  
載予文大鄭烈烈

送張魏縣序

夫用不利不謂之學民不安不謂之政非學則失所以  
為士非政則失所以為臣元傑敏學矣而有不知政者  
哉夫民以政馭學以政行政以欲壞欲者賄也名也成  
官自賄則下鮮廉得最循名則下鮮實賄或敗官名可  
惑世故有薄賄而厚名章名而陰賄者也夫歛幹辨則

休養不暇理矣尚逢迎則方直不暇修矣好營建則儉約不暇顧矣齊薄書則真偽不暇覈矣夫道無歧由心無兩凝援上必虐下務外者慝必積於內古之君核名者無如漢宣古之臣飾名者無如王成不明不忠今滋烈矣偽可行乎哉是故好名必偽偽者必改故曰君子誠之為貴

辯似

孔子有言惡紫之奪朱也夫善惡猶水火之不相入也

顯諸事則相背而易知藏諸理則相近而難辯故舉輿  
薪者非至明也聞雷霆者非極聰也第堯桀者非上知  
也君子之於道非任不成非氣不至自是似任而非客  
氣似氣而害自任者慮歛而强自是者喜盈而損正氣  
養而益昌客氣暴而易折君子之學無成而不至者自  
是與客氣為之也夫志道為任配道為氣堅任而馭氣  
為心心猶泉也道之則流浚之則新蓄之則充擾之則  
濁實之則塞是故實莫厚於自是擾莫慘于客氣二者

未除其行謂之襲其功謂之假

賀吳御史考滿序

吳子守御史三年考績部署考曰明以成身恩以榮親洋聞進者  
御史孟無涯子曰吳子政以成身恩以榮親洋聞進者  
成善者榮賀以相之辭以章之其諸古之道與崔子曰  
然無缺為成不辱為榮君子願乎哉有成而見榮則遂  
心而揚氣業必隳夫知缺者知成者也知辱者知榮者  
也斯君子賀之矣今之贊治者曰部曰科曰臺部知行

言弗給議者弗深罪之科知言行未昌責未寄焉御史  
得言且行者也夫節義者我也非夫人也不見則不能  
不勉則不敢思利於家則傷國思安其身必危君銑聞  
之言之道二曰救曰勸貴乎防行之道二曰激曰揚貴  
乎化豫而止之謂之防默而移之謂之化防莫如隄化  
莫如風隄固雖狂流必順風鼓雖微草必變夫患成而  
救之則鮮弭善消而勸之則鮮復其名曰慢臣世興行  
而纖惡可激也故刑煩而疑世紕邪而巨善可揚也故

卷一  
賞寡而沮其名曰棘臣慢臣廢棘臣斅是故防生於明化生於公明公生於畏

孝答贈二陸守

姚江陸叅政先生長子相以郎中出守長沙次子棟以御史出守河間或曰斯可謂盡孝矣乎洹野子曰可以為孝矣未可為盡也吾聞漢陳氏世倍其貴而天下曰慚宋張栻氏位未半其父而世稱之曰賢然則繼述之道可知已是故節者易枉而難樹才者難達而易滯能

兼者賢倘來者位賢而在位貽親以令名位以榮我也  
不賢而在位貽親之惡名位以辱我也辱則君子無取  
焉爾

序李氏詩畫卷

人之趨善也亦有漸焉貴張人之伐富塞人之聰既張  
且塞善斯遠矣畫者肖物之形也詩者合物之情也物  
文形而後肖之詩觸情而後合之肖以察物理合以興  
已志是故君子之自文也內義必有緯外度必有矩於

是乎遠近象之法行而化成斯天下後世誦之矣於戲  
君子之於學無惑而不存乎爾

賀鄭都指揮序

崔子曰日者薊盜之起八人也度險如夷治緩溢為萬  
人大師而後克之賞也勞者下勢者上夫德衰而後有  
政政格而後有兵兵怠而後有賞故化世不言政治世  
不言兵振世不言賞賞而猶失末孰甚焉昔問丘氏之  
子也溺其父號於國中曰能救子者予金漁人援之出

問丘氏之戚攘為已德其父金其戚而徒勞漁人及其  
次子復溺號猶前也國中無應者故信古之所貴也銑  
外女弟之夫存亦從師有功自指揮使陞都指揮僉事  
銑外舅鶴翁及鄉大夫賀之銑曰爾存功倍於爾者爾  
知之功蔑於爾者爾知之恩倍當安思蔑當慎自爾祖  
至爾為都指揮三世矣爾父尚行嗇家夫盈而能守故  
有爾今日爾惟嗣德惟孝爾惟報賞惟忠爾惟納賀惟  
畏且銑聞之福不可妄受曰持貴不可徒居曰稱不持

福則為戾不稱貴則為辱夫善飲者餘其量適也滿其量猶或可勝也過之鮮不困且病矣故君子懼福而憂貴又曰爾存爾達爾毅爾欲尚官其夙夜守予言斯克有勲有聞

西涯樂府何氏解序

銑之使梁也見何子孟春西涯樂府解曰唯涯公能指昔夫之心唯何子能逆涯翁之志可以策可以沮可以發樂府之道其備矣乎先王之治天下也曰化曰政曰

樂化以遷政以格樂以興且永成化而達政者樂也孔子曰詩三百一言以蔽之思無邪善不章惡斯縱矣惡不誠善斯止矣雖堯舜未之能治也夫樂者聲以宣辭以陳事其旨遠其言婉其意切遠則思可深婉則感可入切則聽可久和于歌被于器始于家極于邦國不戒而孚不猛而厲是故直而敷者類乎文顯而斥者類乎訏巧而誘者類乎謔質而淺者類乎野華而飾者類乎靡斯皆遠于樂之道矣

廣志贈劉遠夫

崔子論今之贊治者曰得言且行者御史劉子為御史  
三年辛未上疏勸學與政壬申按遼東榷權枉而字卒  
既言且行劉子其御史與劉子甘禍如素左秩如忘如  
是其言且行也孰禦夫燭事存乎識當事存乎氣識有  
闇明氣有盈歉故得失生焉故介茹彥博安石吐準決  
澶征天書獻虛生識義生氣居弗安必搖業弗新必畫  
畫者為機搖者為蠹燕石之白耀玉也火之則燼東郭

氏之大瓠實以石漿則溢故君子審安而正業順不忘  
逆不沮久不怠須臾不舍是故蘊之精發之中行之遠  
昔顏孫子曰令尹子文三仕無喜色三已之無愠色仁  
乎夫子曰忠矣孟孫氏曰仁人心也

釋思送許公還汝南

山東僉事許君達以俾來言曰達幸有父母在又幸有  
祿足以養懼盜不果迎暨盜平吾親始來居一年而欲  
歸達實無以為情也銑聞之曰君達其欲事親者乎孟

子曰曾子養志事親若曾子可也君達爾翁媪之來就  
養而已乎銑聞之鄉人爾翁達理而畏媼能相之往者  
益起越國入郡邑如虛君達令樂陵能守能戰能馘首  
凶夫夫知君達忠朝董戎典越階陟君道大於邑憲尊  
於令夫人績損於不繼志怠於小獲夫親喜其績則思  
見之慮其終則思教之見而慰教而安歸樂桑梓可矣  
君達爾遂爾親欲母以過思為也且銑聞之功不可喜  
喜必要才不可恃恃必肆實無虧正無回備無敗夫欲

行陸者以馬郭遊羸可也百里遊駕可也千里遊者非驥  
中道罷且仆是故君子非不貴之患居而無令事之患  
又曰君達爾謀力多才監銑之言斯克事爾親

野聞三首贈張御史仲修

太史氏使梁過琉璃村有丈夫以數童子逐雄雞且詣  
之太史氏曰爾何讎雞為不大棘邪丈夫曰此雞適鳴  
太史氏歎曰雞晨其音又何尤焉君子言也時人皆聽  
之

涿田旱天忽興雲將雨農人不甚說也太史氏曰爾不欲雨邪農人曰雲暴騰而無畜雖雨亦不洽雨陰陽之交也聚斯厚厚斯醞醞斯雨則霈然矣已而雨果不成太史氏曰畜之用大矣哉

太史氏渡白溝曰美哉河水胡不楫之以達滹衛以利商旅漁人曰河壯瀉而無節故時有洲洲則舟膠而不可行河有九曲而大江歷三峽而永險者降其汜者也徐者均其達者也斯可楫可利太史氏曰其然其然故

君子擬議以成其變化

送師御史序

孔子有言誦詩三百授之以政不達雖多亦奚以為故君子不治苟得斯精其業不先藻具斯大其用師愚誦詩二十年用其采以發身用其實以理官夫升而貞者不息也旅而安者即次也貞安可以利其事業詩曰淑人君子心如結兮夫眩以行必變枝以語必離二以任必奪故火之炎水之濕聾瞽亦信之詩曰周道如砥君

子所履權輔經者萬名定也實待虛者一其止也是故  
堯協萬邦而舍其子孔賄館人而嗇於回情有不敢伸  
強有不敢遂新有不敢先舊大有不敢越小同軌之車  
燕徐合轍不縮之勇聖哲懦中詩曰采采芣苢薄言禰  
之用言芻蕘可師也不改法言可贊也聞言而不能擇  
則嗟以淆擇而不能會則錯以礙礙且淆必欹吾之衡  
矣故輕重為之反夫奸者君子之所防也暗者君子之  
所燭也毒莫如鴉愚夫知辟之酒甘毀軀明者或樂焉

是故言稽其自行察其心吝毀窮其與順拂反諸已防  
奸燭暗之道也詩曰肅肅兔置施于中林子不忘親則  
孝有終婦不忘夫則貞不失故入山思登無易步矣涉  
險思濟無急楫矣臣不忘乎君則遠近幽顯無乎不奉  
公詩曰維子之故使我不能息兮忠臣之行也

挈財

有序

御史張起溟巡淮鹽問政於予乃作是篇

挈財則惠均專利則怨聚患者雖庸亦行怨者雖明不

終其說在梁相之治水趙司馬之論養勇也夫治事閭  
必缺窮搜而介舉斯民擾而沮者至矣故咸丘氏之御  
不成梁相者燕人也相梁然有其才汝水介梁韓間為  
利饒韓地亢而梁下歲潦毀梁隄水入平澗寢訟相大  
發民取馬陵土障之使入韓且陰決韓堤韓饑而梁稔  
韓人知之大舉伐梁新中生問戰勝於趙司馬司馬曰  
兵勇兵勇有道乎曰養夫均衣而時食公勞而更逸然  
非分數明不可行已新中生習其說入楚為將一年取

弦及黃秦人失御學咸丘氏齊之御人也聞之入秦秦人以為僕正期年田必獲征必利咸丘氏性察其銜勒繁其控騫棘馬數疲而騫二年汧渭中無馬

賓筵贈別詩序

癸酉冬張御史將按京輔翟太史而下十人餞于王少卿第酒中御史辟席曰秩袞幕尊旋儀出遜是諸子之禮仁也言不及別酒不至強是諸子之愛仁也夫禮貴成乎其人愛貴昌乎其業唯諸子何以贈使仁獲免咎

焉咸諾之王君希孟張員外繼孟各賦詩一諸子和之  
銑讀之歎曰別也者交者也贈也者別者也深交不  
別不重別不贈吾見別若贈矣放者酣以為厚弱者戀  
以為固懿哉諸子之贈也諷不晦其旨直不厲其辭要  
其美以起其永危其難以重其輕興其志以堅其節可  
以言贈矣夫禮取諸義而制其情愛取諸公而略其私  
於乎雖治天下可也

河東書院志序

昔者夫子教於洙泗之間修禮樂之文明仁義之實從者三千人及其之列國也或崇或沮或召或問夫治世之教也上主之故德一而俗同季世之教也下主之故德二三而俗錯同者行錯者格夫子感奠楹之夢歎曰天下其誰能宗予蓋傷其不得同也張御史仲修巡河東鹽以暇日作河東書院既成作志三篇曰費取諸山野曰力取諸逸夫曰範取諸古曰文翰取諸今之立言者曰書取諸經史御史謂貢士樊君瑩曰隆也竊懼夫繼

者或踵予跡而或隙其術以厲人也又竊懼夫議者以此為疣事曰今之學之政之存也均之重隆之罪也夫故志之云爾崔銑仲鳬父序

梁古谷先生墓誌銘

予聞石翁陳子之學去支離之用全虛圓之神始乎靜終乎自然先生首與李伯溫兄弟從之每退入山室靜坐暇則考覽墳籍十年而學成翁館先生于家俾訓其諸孫翁晚年居碧玉樓嘗與先生極論名理知其大有

得也乃號先生曰見王先生與嘉魚李世卿吳獻臣相  
厚善詩劄之遺無虛歲餘無所與親李世卿者李承箕  
也攻古文養志不仕吳獻臣者吳廷舉也有經濟才劉  
瑾竊政時疏論中使贊貨械首十日不死釋之不屈交  
友有終未冠喪親有聞平生無儋石儲晏如也語曰不  
知其人視其所事及所予先生弱體多病年十二母猶  
負之一日在褓中直其足將及地其父笑曰爾且與母  
長矣尚作嬌乎稍長好讀書母常滅燈令寢且戒勿宿

火先生姑從之後復之舅家與儕輩讀焉父歿葬始用  
灰隔喪尚哀素不用浮屠始用質明行祭事性好吟詩  
不苦鍛削石翁贈詩曰得雨花畦潤隨風鳥韻長公來  
詩不少排日兩三章不嗜酒武人強引一杯酌之病兩  
月而差先生名文冠字華卿廣東順德人少號鶴山晚  
居古谷種梅錄所為詩千篇續之號古谷老人正統辛  
酉生正德辛未九月一日卒年七十有一壬申正月八  
日葬妻陳氏之子五人曰景復景行景孚景熙景倫側

室之子二人曰景與景望女一人曰宜孫四人曰肇阜  
準卞景行銑友也廉直有文為崇明知縣銘曰鼓樓之  
陽先生藏矣於萬斯年子孫享矣

湯陰縣修城記

正德六年春薊盜起陷城殺長吏雜民如草秋八月彰  
德府通判鄭公如阜奉臺檄修湯陰縣城而大之夫什  
立里甲什立長使第稽勸號以四鉦鳴則咸拔以度不  
鳴則築越十有八日而成其圍八百四十九丈其高二

丈有五尺其基濶三丈自基以上斂之其短牆一千二百四十堵其濠濶深均二丈也南北月城二城樓六鋪二十四所又修弓矢砲置快手使習之十月初賊劉七果以賊衆來攻城賊火且射越二日弗克攻去七年二月賊又來攻城又弗克南去攻胙城陷民半死焉賊黨楊虎渡河趙鏗劉三遂連破西平上蔡十餘城太史氏曰於乎自賊之起也郡縣唯視城為存亡堅者全敝者陷無者殲嗟乎民之患慘矣

王恭人墓誌銘

恭人中丞王公哲之妻中處士志仁之女吳江人也恭人年十七歸中丞中丞為御史時奉命按廣東中丞父樂善先生病且棘矣恭人治湯藥惟謹夜不寢晝不甘食閱數月樂善竟不起恭人哀毀如不能存含襚衰奠如禮鄉人歎曰使御史自為之無能過也恭人歸中丞數年生一女殤恭人曰妻者因嗣而有也無嗣則將殄人之宗男子四十而衰女子三十而血耗逮其衰也而

後駁而圖之豈可必乎豈可必乎遂告其舅姑曰新婦  
不宜子夫子之寵婦不敢專也為置三側室時中丞甫  
壯歲既而皆有子若女曰徐氏生子子京子東女某適  
某曰陳氏生子子家女某適某曰郭氏生子子木子术  
女某正德四年冬中丞自山東副使進廣東按察使過  
吳江是時劉瑾竊政迂途歸者械首中丞倉皇而別恭  
人病醫之不愈時太恭人在堂恭人曰吾事姑不終吾  
死不得與吾夫訣恨哉悲哉悲哉恨哉明年正月五日

卒年五十有五七年中丞謝政歸始以十二月二日葬于王山明年中丞亦卒恭人治家訓子俱可儀不著獨表其大義以詔其子孫銘曰夫曰吾有婦子曰吾有母嗟彼貞媛式子爾後

孫少卿墓表

正德六年蜀盜寇漢中略陽漢中間道也都御史藍公章集省臺議略陽知縣嚴順懦扶風知縣孫璽毅而多知可使遂檄璽往城略陽扶風君既至略陽將下令順

恥之教邑人賂扶風君金求勿城扶風君不聽日周行  
相地勢布民築之期一月成城未届期蜀盜卒至城三  
面成東門觀堵始立城中兵適調他所嚴順曰城必不  
可守已曷亡扶風君又不聽順故令也城中人聞之譁  
欲亡扶風君抽佩刀斫坐杌曰敢言亡者如杌乃盡出  
城中弓矢刃令士賈與隸人持之登城礌石積城上如  
阜水沃氈披之障矢甲統十人總甲統五十人總甲五  
十人官與士統之曰令爾守南城曰薄爾守北城曰典

史爾守西城曰東城未堅惟予守曰爾士爾甲賊如陷  
城戮爾父子妻爾女火爾室蕩爾蓄爾寧勿傷心義生  
勇勇則無敵曰凡我官存亡視城民胡可棄天子命吏  
勿奔曰爾士爾甲晝傳食夜張火鳴柝爾甲執予扇傳  
命斷者刑舟人為令發篋上舟獲之割舟人耳鼻以徇  
閱三日賊弗克攻欲去會賊執告急人殺之發公移知  
城中窘悉賊衆環攻之攻東城自辰至晡不下有健賊  
戴木案趨城下礌石下破腦而死已而順奔賊陷南城

入執扶風君扶風君罵賊賊齎殺之七月十四日也賊  
大掠三日去順渡江還贖報曰與扶風知縣同奔而溺  
水蕩扶風知縣尸都御史怒責求尸棘順大窘與簿謀  
取江濱一尸棺之還其鄉其兄弟暨子暨族人啓視之  
多鬚而碩體非扶風君也乃走京師投匱辯事下御史  
王廷相治乃得實奏上制贈光祿寺少卿賜祭蔭子紹  
卿為國子生於乎順非宿憾君惟恥其無能語曰悽心慘  
於戈小忿必敗大謀扶風君死信烈矣漢中非荒裔也

猶待辯而核否則上下罔於順而不知自蜀盜起至扶  
風君死時已數年是時薊盜寇中域桃源盜寇江西數  
有邊警值世久平文臣短於謀武臣短於勇長吏習於  
奔初東強陷民於城下得戶肘繫縣印知為令段易也  
朝廷創聞死事者嘉之贈太僕少卿蔭子為錦衣百戶  
世襲已而予所聞上蔡令霍恩西平令王佐裕倅郁采  
與扶風君事甚偉夫迫而死偶而死畏而死激亢而死  
彼猶有驅之也志定矣功修於素節堅於危而安真丈

夫哉扶風君字廷信山西代州人明春秋深慕荀息之  
為人少舉於鄉初令諸城再令扶風有治績死時年四  
十七其兄璿弟珂從子太史紹先紹祖子紹卿具衣冠  
招魂葬于代州東門外

贈董先生序

士之道有五遇五不遇器大則適於用則遇多謀而慎  
發則中則遇明於義而晦其迹則不取尤則遇守介而  
不回則事立則遇多諧而寡忤用以輯功則人不忌則

遇器大或不屑小物必近疎則不遇謀心勝則多疑求全之心勝則後時必近迂則不遇晦迹或越於禮必近蕩則不遇介者多異必近矯則不遇諧者尚同必近佞則不遇故遇治亂之幾也子曰同心之言其臭如蘭昔車千秋常臣也一言合而相董仲舒儒也汲黯爭臣也終身而擯猶有甚焉晏嬰不知孔子司馬光則夷狄慕之故君子不求諸人懼喪乎其已不執其偏懼賊乎其全文中子曰執方之謂器通變之謂道君子可與語道

矣夫董先生者壽張人御史建中之父也先生樂易高  
爽居常晏如出而求仕授吳江主簿先生無慍色石川  
殷子雲霄曰先生其內足者乎又曰先生其有政矣內  
足者往無不利銑曰然

白髮倡和詩序

白髮張大夫感已也京之才士有大夫之感者和之音  
愴而肯邃讀者莫不動心焉夫悲莫慘于過時恥莫大  
于罔功時之難得而易失功之易敗而難成時也者一

言而悟非時也者萬言而寔不可必也不可易也雖然  
今有人焉視遠則遺其狀而察其姿聽遠則遺其揚而  
察其舒卒之失貌而亡聲棄乎得為之業而日孜孜然  
所不得為之冀斯惑矣夫壯有以決行有以禁非老有  
以隱素有以成德銑聞之內乎其用者不取諸外足乎  
其具者不計諸時周乎其性者不責諸年故先師曰不  
知老之將至云爾

贈王嘉興序

漁翁

四九

王嘉興汝言之為御史也按蜀值蜀用兵御史發朋欺而治之雖秉鉞者罔不惴惴圖後功予聞而壯之越一年予見御史于呂涇野太史之家涇野與予論兵皆主嚴御史曰情不易白事難劇具晦情乖事而法焉逞乎予又歎御史仁也越三月御史被命知嘉興其鄉人呂九川司諫思所以贊嘉興之政之成俾予告之世之論御史者曰執法論知府者曰牧民夫泥影以定形雖專弗真執方以求運雖勞罔濟嘉興為御史不忘乎仁則

為牧可知已昔唐柳仲郢先治京兆矣嚴又治河南矣  
寬疆分而受氣別俗異而為政因一門之中十室之邑  
賢不肖異焉獲於一而欲槩於萬利乎已而遂齊乎人  
敗之必至也鳬氏鑄鐘第聲制器因范調火時至而出  
之然後聲無石且播規矩之操於公輸子也大小短長  
與木逶迤要之方圓中是故仲郢之治知新之學也鳬  
鐘之制知成之道也公輸子之中知要之則也

贈李典籍序

高陵李先生守典籍三年考績得上考將還南監司諫  
呂道夫偕銑往餞之李先生吾友呂太史仲木之外舅  
也吾友之賢天下莫不聞先生恬雅沉篤見容者消其  
客接言者去其躁昔孔子稱子賤謂魯有君子焉夫君  
子者立教則變宋有石介者直講也太學自介興故道  
有可尊不計乎其官人有可師不賴乎其勢先生之職  
典籍也自經而下咸在焉凡數十萬卷矣當年不能誦  
其辭累世不能究其學太史公已病之夫先王之道存

乎經耳學者倦於行於是乎深性命之談亡其本於是乎長顰革之飾始也以經進而中也與經戾是故習詞賦曰屈曹而已矣不曰風雅習文章曰遷固而已矣不曰典誥習訓詁曰王鄭而已矣不曰汲軻習事功曰律例而已矣不曰經術習玄理曰虛靜而已矣不曰孝弟習通變曰謀術而已矣不曰仁義甚者勦古義而易其文卑已就而高其論代增人行假以名世學者皆眩迷而不知要銑聞之古詩三千篇孔子刪為三百而後始

可誦法夫慕父母者孝子之行履六經者醇士之學是故經行而習同習同而德立德立而化行化行而後天下國家可從而理也

瞻辰樓詩序

瞻辰樓者徐子之居也徐子居禁垣之南修文而尚友今之名士咸往焉徐子與之登樓賦詩以舒羈旅之懷崔子讀其詩而歎曰悲乎吾之人也變因乎其時止隨乎其寓情發乎其感情也者抑之則鬱聚之則滯於是

乎登高騁望抗志於古而寄情於物是故望雲者思其  
親懷土者傷其寄感時者啓其用玩物理者覈其妙瞻  
廷闕者欲獻其忠於是乎言以抒其情永言以盡其感  
使知者見之詠其言則志可知也察其志則世可知也  
於民教有補焉夫倡騷於化世謂之疣憂鼓缶於是日  
謂之裔樂痛微而號者痛之招豫初而鳴者豫之棄故  
賢愚同情所異者正而已矣憂樂同言所異者和而已  
矣子云關雎樂而不淫哀而不傷

金匱要略

卷一



溫詞卷一